



চট্টগ্রাম সিটি কর্পোরেশন

জনসংযোগ শাখা

চট্টগ্রাম

মোবাইল নং-০১৮২৪৪৭৭৬৯৩



(প্রেস বিজ্ঞপ্তি-১)

মেয়র রেজাউলের সাথে বিপিসি চেয়ারম্যানের সৌজন্য সাক্ষাত

চসিকের উন্নয়ন কাজে সহায়তা

করতে চায় বিপিসি

চট্টগ্রাম-২৪ ফেব্রুয়ারি'২০২১খিঃ

চট্টগ্রাম সিটি কর্পোরেশনের মেয়র মোহাম্মদ রেজাউল করিম চৌধুরীর সাথে আজ বুধবার সকালে টাইগারপাসে কর্পোরেশনের অফিসের তাঁর দপ্তরে সৌজন্য সাক্ষাত করেন বাংলাদেশ পেট্রোলিয়াম কর্পোরেশনের চেয়ারম্যান(সচিব) মো. আবু বকর ছিদ্দিক। সাক্ষাতকালে মেয়র তাঁকে ফুল দিয়ে শুভেচ্ছা জানান। বিপিসি চেয়ারম্যান নতুন মেয়রকে অভিনন্দন জানিয়ে ক্রেস্ট ও একটি কেক উপহার নিয়ে আসেন যা তাঁর হাতে তুলে দেন। এসময় তাদের দুজনের মধ্যে চট্টগ্রাম নগরীর অবকাঠামোগত কর্মকাণ্ড ও অর্থনৈতিক উন্নয়নের সম্ভাবনা নিয়ে আলাপ আলোচনা হয়। আলাপকালে বিপিসি চেয়ারম্যান বলেন, চট্টগ্রাম নগরীর অভিভাবক হলেন মেয়র। তাই নবনির্বাচিত মেয়র রেজাউল করিম চৌধুরীর সাথে সৌজন্য সাক্ষাত করলাম। তিনি বলেন, চট্টগ্রাম সিটি কর্পোরেশনের সাথে নগরীর উন্নয়নের স্বার্থে যেখানেই কাজ করার সুযোগ থাকুক সেক্ষেত্রে আমরা কর্পোরেশনকে অগ্রাধিকার দেব। বিপিসি চেয়ারম্যানের কথা প্রসঙ্গে মেয়র রেজাউল বলেন, নগরীর ভাঙ্গা-চোরা রাস্তা নিয়মিত পেচওয়ার্কের মাধ্যমে মেরামতে কর্পোরেশনের ১৫০ টনের মত বিটুমিন প্রয়োজন। যার চাহিদাপত্র ইতোমধ্যে দেয়া হয়েছে। তিনি এব্যাপারে বিপিসি চেয়ারম্যানের সহযোগিতা কামনা করেন। বিপিসি চেয়ারম্যান আরো বলেন, বাংলাদেশের সব কর্পোরেশন এলাকায় চাকরিসূত্রে আমার ঘুরার সুযোগ হয়েছে। তবে চট্টগ্রামের মানুষের সারল্য, আতিথেয়তা আমাকে খুব টানে। আবু বকর ছিদ্দিক আরো বলেন, বাংলাদেশ পেট্রোলিয়াম কর্পোরেশনের অঙ্গ প্রতিষ্ঠান ইস্টার্ন রিফাইনারী লিমিটেড দেশের একটি গুরুত্বপূর্ণ প্রতিষ্ঠান। এই প্রতিষ্ঠানে বর্তমানে তেল শোধন করতে পারে দৈনিক ৪৫ লাখ টন। নতুন আরেকটি ডিপোর কাজ চলমান রয়েছে যা সম্পন্ন হলে দৈনিক ৬৫ লাখ টন তেল শোধন করা সম্ভব হবে। আর বিটুমিন ইচ্ছা করলেই বেশী উৎপাদন করা যায় না। আলাপকালে মেয়র রেজাউল করিম চৌধুরী বলেন, কর্পোরেশনের প্রতি সপ্তাহে ২০০ টন বিটুমিন লাগে। যা নগরীর ভাঙ্গা রাস্তা মেরামত কাজে ব্যবহৃত হবে। এই চাহিদার বিপরীতে যত রকম সহযোগিতা লাগবে তা বিপিসির পক্ষ থেকে করা হবে প্রতিষ্ঠানটির চেয়ারম্যান মেয়রকে কথা দেন। সাম্প্রতিক সময়ে কোভিড-১৯ এর কারণে উৎপাদন কাজ কিছুটা ভাটা পড়ে বলে মেয়রকে অবহিত করেন বিপিসি চেয়ারম্যান। এসময় কর্পোরেশনের প্রধান নির্বাহী কর্মকর্তার অনুরোধের প্রেক্ষিতে চসিকের আবর্জনা পরিষ্কার কাজের জন্য কিছু তিন চাকার ভ্যান দেবেন বলে বিপিসি চেয়ারম্যান জানান। তিনি এসময় শিঘ্রই এর জন্য একটি পত্র তাদের বরাবরে দিতে বলেন। বিপিসি চেয়ারম্যান তাদের প্রতিষ্ঠানের কোন পৌরকর বকেয়া থাকলে তাও পরিশোধ করে দিতে আগ্রহ প্রকাশ করেন। এসময় কর্পোরেশনের প্রধান নির্বাহী কর্মকর্তা কাজী মুহাম্মদ মোজাম্মেল হক, বাংলাদেশ পেট্রোলিয়াম কর্পোরেশনের পরিচালক (যুগ্ম সচিব) সৈয়দ মেহুদী হাসান, সচিব (উপ-সচিব), মো. লাল হোসেন, চট্টগ্রাম সিটি কর্পোরেশনের রাজস্ব কর্মকর্তা মফিদুল আলম, প্রধান শিক্ষা কর্মকর্তা সুমন বড়ুয়া, মেয়রের একান্ত সচিব মো. আবুল হাশেম, অতিরিক্ত প্রধান হিসাব রক্ষন কর্মকর্তা হুমায়ুন কবির, তত্ত্বাবধায়ক প্রকৌশলী সুদীপ বসাক, বিপিসি চেয়ারম্যানের একান্ত সচিব মো. আহমদ উল্লাহ উপস্থিত ছিলেন।

মেয়রের সাথে সাক্ষাতকালে সাবেক মন্ত্রী

ইঞ্জিনিয়ার মোশাররফ

নাগরিক সেবা পেতে কর্পোরেশনকে

সহযোগিতা করুন

চট্টগ্রাম-২৪ ফেব্রুয়ারি ২০২১খ্রিঃ

চট্টগ্রাম সিটি কর্পোরেশনের মেয়র মোহাম্মদ রেজাউল করিম চৌধুরীর সাথে আজ বুধবার সকালে টাইগারপাসে কর্পোরেশনের অফিসের তাঁর দপ্তরে সৌজন্য সাক্ষাত করেছেন গৃহায়ণ ও গণপূর্ত মন্ত্রী ইঞ্জিনিয়ার মোশাররফ হোসেন এমপি। ইঞ্জিনিয়ার মোশাররফ হোসেন দেখা করতে এলে নব নির্বাচিত মেয়র ফুলেল শুভেচ্ছা জানিয়ে তাঁকে বরণ করে নেন। পারস্পরিক কুশল বিনিময়ের পর সাবেক এই মন্ত্রী বর্তমানে চট্টগ্রাম সিটি কর্পোরেশনে নাগরিক দুর্ভোগ কমাতে কি সমস্যা আছে তা নতুন মেয়রের কাছে জানতে চান। তাদের আলাপে নতুন নগর ভবন নির্মাণ কাজ শুরু করা, পরিষ্কার-পরিচ্ছন্নতা ও রাস্তাঘাটের মেরামত কাজকে আরো কিভাবে গতিশীল, বর্ধিষ্ণু জনসংখ্যার চাপের সাথে ভাসমান হকারদের কিভাবে পুনর্বাসন করে নগরীকে জঞ্জালমুক্ত করে জন চলাচলের উপযোগি করা যায় তা নিয়ে আলাপ হয়। ইঞ্জিনিয়ার মোশাররফ তাঁর মন্ত্রীত্বকালীন সময়ের অভিজ্ঞতা ও দেশ-বিদেশে ভ্রমণের আলোকে চট্টগ্রাম সিটি কর্পোরেশনকে আত্মনির্ভরশীল করতে আয়বর্ধক প্রকল্প গ্রহণ করতে মেয়রকে পরামর্শ দেন। তিনি নিম্ন আয়ের ও শহরের বস্তিবাসীদের পুনর্বাসনে কমমূল্যে কোন আবাসনের প্রকল্প গ্রহণ করা যায় কিনা তা ভাবতে বলেন। মোশাররফ মন্ত্রী থাকাকালে ঢাকায় আবাসনের বেশ কিছু প্রকল্প নিয়ে সফলতা পেয়েছেন বলে মেয়রকে জানান। আলাপকালে চট্টগ্রাম সিটি কর্পোরেশনের মেয়র রেজাউল করিম চৌধুরী বলেন, আমি বুঝে শুনে ধীরে সুস্থে পরিকল্পিত উপায়ে এগুতে চাই। কর্পোরেশনের আর্থিক অবস্থা বর্তমানে খুব একটা ভালো না। এই সীমাবদ্ধতার মধ্যেই আমাদের কাজ করতে হবে। তাই পরিচ্ছন্ন নগর গড়তে প্রয়োজনে পাইলট প্রকল্প নিয়ে প্রাথমিক পর্যায়ে দুইটি ওয়ার্ডের পরিচ্ছন্ন কাজ আউট সোর্সিংয়ে দেয়া যায় কিনা দেখবো। যদি সুফল মিলে তবে ধারাবাহিকভাবে সবগুলো ওয়ার্ডকে দিয়ে দেয়া হবে। আলাপকালে ইঞ্জিনিয়ার মোশাররফ হোসেন নতুন নগর ভবনের কাজ চট্টগ্রাম সিটি কর্পোরেশনকে নিজস্ব উদ্যোগে করার পরামর্শ দেন। তাঁর আগ্রহের জবাবে কর্পোরেশনের প্রকৌশল বিভাগ সূত্রে জানা যায় নতুন নগর ভবন নির্মাণের প্রকল্পটি বর্তমানে প্রি-একনেকে পর্যবেক্ষনের পর্যায়ে আছে। মোট ২২ তলা ফাউন্ডেশনের প্রস্তাবিত এই নগর ভবন প্রকল্পে আছে ২টি বেজমেন্ট। চসিক অফিসের পাশাপাশি থাকবে কমার্শিয়াল স্পেস, ব্যাংক বীমার অফিস। দীর্ঘ আলাপকালে ইঞ্জিনিয়ার মোশাররফ হোসেন বলেন, আমাদের দেশে কেউ আইন মানতে চায় না। সমস্যা তাই থেকে যায়। হকার মার্কেট আছে, কিন্তু ওখানে ব্যবসা যারা করছে তারা হকার না। সুউচ্চ ভবন নির্মিত হয়েছে কিন্তু মানা হয়নি বিল্ডিং কোড। বিল্ডিং কোডের বিষয়ে চট্টগ্রাম উন্নয়ন কর্তৃপক্ষও আন্তরিক না মনে হয়। যে কোন ভবন ফুটপাত থেকে ৫ ফুট দূরত্বে নির্মাণের আইন আছে। কিন্তু কেউ মানছে না। যে কারণে জনজীবন বিপর্যস্ত তাই আইন মানার পাশাপাশি নগরবাসীকে চট্টগ্রাম সিটি কর্পোরেশনকে সহযোগিতা করতে হবে। নাগরিক সুবিধা পেতে নিয়মিত পৌরকর দেয়া চাই। কর না দিলে কর্পোরেশন সেবা দিবে কিভাবে? এ শহর সবার। তাই মিলেমিশে এ নগরকে সুন্দর করতে হবে। তিনি তাঁর পক্ষ থেকে চট্টগ্রাম সিটি কর্পোরেশনের নব নির্বাচিত মেয়র রেজাউল করিম চৌধুরীকে সব ধরনের সহযোগিতা করা হবে বলে কথা দেন।

এসময় রাজনীতিক এডভোকেট সুনীল কুমার সরকার, শফিক আদনান, হাসান মাহমুদ শমসের, জসিম উদ্দিন শাহ, নুরুল আনোয়ার বাহার, চট্টগ্রাম সিটি কর্পোরেশনের প্রধান নির্বাহী কর্মকর্তা কাজী মুহাম্মদ মোজাম্মেল হক, প্রধান রাজস্ব কর্মকর্তা মফিদুল আলম, মেয়রের একান্ত সচিব মো. আবুল হাসেম, অতিরিক্ত প্রধান হিসাব রক্ষন কর্মকর্তা হুমায়ুন কবির, অতিরিক্ত প্রধান প্রকৌশলী রফিকুল ইসলাম মানিক, তত্ত্বাবধায়ক প্রকৌশলী বুলন কুমার দাশ, সুদীপ বসাক প্রমুখ উপস্থিত ছিলেন।

সংবাদদাতা

স্বাক্ষরিত/-

(কালাম চৌধুরী)

জনসংযোগ কর্মকর্তা (অতিরিক্ত দায়িত্ব)

চট্টগ্রাম সিটি কর্পোরেশন

মোবাইল-০১৮২৪-৪৭৭৬৯৩